

ՀԱՅԱՍՏԱՆԻ ՎԵՐԱԿԱՆԳՆՎՈՂ ԷՆԵՐԳԵՏԻԿԱՅԻ ԵՎ ԷՆԵՐԳԱԽՆԱՅՈՂՈՒԹՅԱՆ  
**Հ Ի Մ Ն Ա Գ Բ Ա Մ Ի**  
Կ Ա Ն Ո Ն Ա Դ Բ Ո Ւ Թ Յ Ո Ւ Ն

**1. Ընդհանուր դրույթներ**

1. Հայաստանի վերականգնվող էներգետիկայի և էներգախնայողության հիմնադրամը (այսուհետ՝ Հիմնադրամ) հիմնադրի կամավոր գույքային վճարների հիման վրա ստեղծված և անդամություն չունեցող, ոչ առևտրային, շահույթ ստանալու նպատակ չհետապնդող կազմակերպություն է:

2. Հիմնադրամն ստեղծվել է Հայաստանի Հանրապետության քաղաքացիական օրենսգրքի, «Հիմնադրամների մասին» և «Էներգախնայողության և վերականգնվող էներգետիկայի մասին» Հայաստանի Հանրապետության օրենքների պահանջներին համապատասխան և իր գործունեության ընթացքում ղեկավարվում է Հայաստանի Հանրապետության Սահմանադրությամբ, Հայաստանի Հանրապետության միջազգային պայմանագրերով, օրենքներով, Հիմնադրամի հոգաբարձուների խորհրդի որոշումներով և սույն կանոնադրությամբ:

3. Հիմնադրամի հիմնադիրն է Հայաստանի Հանրապետությունը (այսուհետ՝ Հիմնադիր):

4. Հիմնադրամի գույքի սկզբնական արժեքը կազմում է 22,362,874 դրամ:

5. Հիմնադրամը գործում է անժամկետ:

6. Հիմնադրի և Հիմնադրամի միջև հարաբերությունները կարգավորվում են Հայաստանի Հանրապետության օրենսդրությամբ և սույն կանոնադրությամբ:

7. Հիմնադրամի կողմից իրականացվող ծրագրերում հնարավոր շահառուներ կարող են հանդիսանալ.

ա/ բազմաբնակարան շենքերի կառավարման մարմինները, այդ թվում կառավարող այլ կազմակերպություններ և ֆիզիկական անձինք

բ/ տնտեսական ընկերությունները (ընկերակցությունները)

գ/ հանրակրթական դպրոցները

դ/ ֆիզիկական անձինք:

8. Հիմնադրամն անվանվում է՝

**հայերեն լրիվ՝** Հայաստանի վերականգնվող էներգետիկայի և էներգախնայողության հիմնադրամ

հայերեն կրճատ՝ **ՀՎԷԷՀ**

անգլերեն լրիվ՝ Armenia Renewable Resources and Energy Efficiency Fund

անգլերեն կրճատ՝ R2E2 Fund

ռուսերեն լրիվ՝ Фонд Возобновляемой Энергетики и Энергосбережения Армении

ռուսերեն կրճատ՝ ФВЭЭА

9. Հիմնադրամի գտնվելու վայրն է՝ 375010, ք.Երևան, փող. Մելիք-Ադամյան 1:

**I. Հիմնադրամի նպատակը**

10. Հիմնադրամի նպատակն է՝

ա/ նպատել էներգախնայողության և վերականգնվող էներգետիկայի ոլորտներում ներդրումների իրականացմանը

- բ/ խթանել Հայաստանի Էներգախնայողության և վերականգնվող Էներգետիկայի ոլորտում շուկայի զարգացմանը
- գ/ նպաստել շրջակա միջավայրի, մարդու առողջության վրա տեխնածին ազդեցության նվազեցմանը
- դ/ մշակել Էներգետիկ անվտանգության, Էներգետիկ համակարգի հուսալիության աստիճանի բարձրացմանն ուղղված մեխանիզմներ
- ե/ ՀՀ կառավարության կողմից համապատասխան լիազորություններ տրամադրելու դեպքում պետության հետ կնքվող գործակալության պայմանագրի հիման վրա պետության անունից կազմակերպել ոլորտի զարգացմանը խթանող վարկային և դրամաշնորհային ծրագրերի իրականացումը:

## **II. Հիմնադրամի գործունեությունը**

### 11. Հիմնադրամն իրականացնում է հետևյալ գործունեությունը.

- ա/ մասնակցություն Էներգախնայողության և վերականգնվող Էներգետիկայի ոլորտի քաղաքականության մշակմանը,
- բ/ Էներգախնայողության և վերականգնվող Էներգետիկայի շուկայի զարգացմանն ուղղված օրենսդրական բարեփոխումների առաջարկությունների ներկայացում
- գ/ աջակցություն Էներգախնայողության և վերականգնվող Էներգետիկայի զարգացումը խթանող նոր արտադրությունների ստեղծմանը և ծառայությունների կազմակերպմանը
- դ/ Էներգետիկ ծառայություններ մատուցող ընկերությունների, ֆինանսական կառույցների և բազմաբնակարան շենքերի կառավարման մարմինների ուսուցում և կարողությունների հզորացում կապված Էներգախնայողության և վերականգնվող Էներգետիկայի ոլորտում ներդրումների կատարման հետ
- ե/ Էներգախնայողության և վերականգնվող Էներգետիկայի նոր տեխնոլոգիաների վերաբերյալ հանրային իրազեկում
- զ/ Էներգախնայողության և վերականգնվող Էներգետիկայի ոլորտում վարկային և դրամաշնորհային ծրագրերի իրականացման կազմակերպում ըստ համապատասխան միջազգային պայմանագրերի և Հայաստանի Հանրապետության կառավարության կողմից տրամադրված լիազորությունների:
- է/ Էներգախնայողության և վերականգնվող Էներգետիկայի ոլորտներում ֆինանսավորման կազմակերպում
- ը/ Բնակելի և արդյունաբերական Էներգախնայողության ծրագրերի ֆինանսավորում
- թ/ Էներգախնայողության և վերականգնվող Էներգետիկայի ծրագրերի ֆինանսավորում՝ վարկերի կամ դրամաշնորհների տրամադրման միջոցով
- ժ/ Աջակցություն Էներգախնայողության և վերականգնվող Էներգետիկայի զարգացման միջոցով շրջակա միջավայրի և մարդու առողջության վրա տեխնածին ազդեցության նվազեցմանը, ներառյալ Կիոտոյի արձանագրության Մաքուր զարգացման մեխանիզմի ծրագրերի բացահայտումով:
- ի/ Ազգային Էներգետիկ անվտանգության բարձրացմանն ուղղված այլ միջոցառումների իրականացում
- լ/ Հիմնադրամին ներկայացվող ծրագրերի փորձաքննում և հաստատում, դրանց իրականացման աշխատանքների ֆինանսավորում, խորհրդատուների, մատակարարների և կապալառուների ընտրության նպատակով մրցույթների նախապատրաստում (տեխնիկական առաջադրանքների և մրցութային փաստաթղթերի պատրաստում) և կազմակերպում, ծրագրի իրականացման հետ կապված բոլոր տեսակի պայմանագրերի նախապատրաստում և ստորագրում
- խ/ Ծրագրերի իրականացման վերաբերյալ հաշվետվությունների պատրաստում ու համապատասխան կազմակերպություններին ներկայացում,

ծ/ Ծրագրով նախատեսված աշխատանքների իրականացման, կապալառուի նկատմամբ վերահսկողության իրականացում

կ/ Ծրագրի շրջանակներում վճարումների կառավարում:

### **III. Հիմնադրամի իրավունակությունը**

12. Հիմնադրամը ստեղծված է համարվում օրենքով սահմանված կարգով պետական գրանցման պահից:

13. Հիմնադրամի իրավունակությունը ծագում է դրա պետական գրանցման պահից և դադարում է Հիմնադրամի լուծարման պետական գրանցման պահից:

14. Հիմնադրամի իրավունքներն ու պարտականությունները սահմանվում են «Հիմնադրամների մասին» ՀՀ օրենքով (այսուհետ՝ օրենք), միջազգային համաձայնագրերով, Հոգաբարձուների խորհրդի որոշումներով և սույն կանոնադրությամբ:

15. Հիմնադրամը, միջազգային համաձայնագրի շրջանակներում ծրագիր իրականացնելու դեպքում, որպես սույն կանոնադրության II-րդ բաժնում նշված Ծրագրեր իրականացնող իրավաբանական անձ օգտվում է միջազգային համաձայնագրերով սահմանված արտոնություններից:

16. Հիմնադրամը՝

- 1) որպես սեփականություն ունի առանձնացված գույք,
- 2) ունի ինքնուրույն հաշվեկշիռ,
- 3) կարող է Հայաստանի Հանրապետության և այլ պետությունների բանկերում բացել բանկային հաշիվներ՝ Հայաստանի Հանրապետության դրամով և /կամ/ արտարժույթով, պետության հետ կնքվող գործակալության պայմանագրերի համաձայն կառավարել պայմանագրերով նախատեսված համապատասխան բանկային հաշիվները,
- 4) ունի իր անվամբ և Հայաստանի Հանրապետության զինանշանի պատկերով կլոր կնիք, դրոշմակնիք, ձևաթուղթ, ինչպես նաև կարող է ունենալ խորհրդանիշ,
- 5) կարող է իր անունից, սույն կանոնադրությամբ նախատեսված գործունեության նպատակներին համապատասխան, ձեռք բերել ու իրականացնել գույքային և անձնական ոչ գույքային իրավունքներ և կրել այդ գործունեության հետ կապված պարտականություններ,
- 6) կարող է դատարանում հանդես գալ որպես հայցվոր կամ պատասխանող:

17. Հիմնադրամն օրենքի սահմաններում, իր կանոնադրությամբ նախատեսված ոլորտների և խնդիրների իրականացման համար, իրավունք ունի՝

- 1) օրենքով չարգելված բոլոր ձևերով ձեռք բերել գույք, տիրապետել, օգտագործել և տնօրինել դրանք ու դրանցից ստացված եկամուտը,
  - 2) նյութապես աջակցել ֆիզիկական և իրավաբանական անձանց օրենքով և սույն կանոնադրությամբ սահմանված կարգով
  - 3) ինքնուրույն կազմավորել իր ֆինանսական ռեսուրսները, այդ թվում՝ փոխառությունների, վարկերի ներգրավմամբ,
  - 4) Հայաստանի Հանրապետության օրենսդրությամբ սահմանված կարգով կնքել պայմանագրեր և կրել դրանց հետ կապված պարտավորություններ,
  - 5) պետական կառավարման և տեղական ինքնակառավարման մարմիններից օրենքով սահմանված կարգով ստանալ տեղեկություններ,
  - 6) ստեղծել առանձնացված ստորաբաժանումներ (ներկայացուցչություններ, մասնաճյուղեր) և հիմնարկներ
  - 7) ստեղծել տնտեսական ընկերություններ կամ լինել դրանց մասնակից՝ ձեռնարկատիրական գործունեությունն իրականացնելու նպատակով,
  - 8) իրականացնել օրենքով չարգելված այլ գործունեություն:
- Հիմնադրամն ունի օրենքով սահմանված այլ իրավունքներ:
- Հիմնադրամը ծրագրերի շրջանակներում կարող է զբաղվել ձեռնարկատիրական գործունեության հետևյալ տեսակներով՝
- ա) ֆինանսական և իրավական խորհրդատվական ծառայությունների մատուցում,
  - բ) ֆինանսական միջնորդություն,
  - գ) հավատարմագրային գործառնությունների իրականացում,

- դ) Էներգետիկական սարքավորումների առևտուր:
18. Հիմնադրամը պարտավոր է՝
- 1) գործել Հայաստանի Հանրապետության սահմանադրությանը, օրենքներին ու այլ իրավական ակտերին, ինչպես նաև սույն կանոնադրությանը համապատասխան,
  - 2) օրենսդրությամբ սահմանված կարգով վարել հաշվապահական և հարկային հաշվառում, գործավարություն, իրականացնել Հիմնադրամի փաստաթղթերի պահպանումը
  - 3) օրենքով նախատեսված դեպքերում և կարգով տեղեկատվություն և հաշվետվություններ ներկայացնել համապատասխան մարմիններին,
  - 4) իրականացնել օրենսդրությամբ սահմանված այլ պարտականություններ:
19. Հիմնադրամին պատկանող քաղաքացիական իրավունքները, ներառյալ դրա պաշտպանության իրավունքը, Հիմնադրամն իրականացնում է սեփական հայեցողությամբ:
20. Հիմնադրամի իրավունքները կարող են սահմանափակվել օրենքով նախատեսված դեպքերում և միայն օրենքով սահմանված կարգով:
21. Հիմնադիրը պատասխանատվություն չի կրում Հիմնադրամի պարտականությունների, իսկ Հիմնադրամը՝ հիմնադրի պարտավորությունների համար: Հիմնադրամի հիմնադիրը պատասխանատվություն է կրում մինչև Հիմնադրամի պետական գրանցումը ծագած՝ նրա ստեղծման հետ կապված պարտավորությունների համար:

#### **IV. Հիմնադրամի գույքը և ծախսերը**

22. Հիմնադրամը որպես սեփականություն ունի առանձնացված գույք և իր պարտավորությունների համար պատասխանատու է այդ գույքով: Հիմնադրի՝ հիմնադրամին հանձնված գույքը հիմնադրամի սեփականությունն է: Այդ գույքը Հիմնադրամն օգտագործում է իր կանոնադրությամբ սահմանված նպատակով:
23. Հիմնադրամը կարող է որպես սեփականություն ունենալ անշարժ և շարժական գույք, դրամական միջոցներ՝ Հայաստանի Հանրապետության դրամով և /կամ/արտարժույթով:
24. Հիմնադրամի գույքի ձևավորման աղբյուրներն են
- 1) հիմնադրի ներդրումը
  - 2) ֆիզիկական և իրավաբանական անձանց այդ թվում՝ օտարերկրյա քաղաքացիների, իրավաբանական անձանց, միջազգային կազմակերպությունների կողմից նվիրատվությունները, նվիրաբերությունները,
  - 3) Հայաստանի Հանրապետության պետական բյուջեից դրամական մուտքերը,
  - 4) դրամաշնորհները,
  - 5) հիմնադրամի և իր ստեղծած կամ իր մասնակցությամբ տնտեսական ընկերությունների ձեռնարկատիրական գործունեությունից ստացված միջոցները,
  - 6) օրենքով չարգելված այլ միջոցներ:
25. Հիմնադրամի սեփականությունը չի կարող օգտագործվել ի շահ իր հիմնադիրների, հիմնադրամի մարմինների անդամների, ինչպես նաև հիմնադրամի աշխատողների, բացառությամբ աշխատողների աշխատավարձի և հիմնադրամի մարմինների անդամների պարտականությունների կատարմամբ պայմանավորված՝ փոխահատուցման ենթակա ծախսերի:
26. Հիմնադրամի ծախսերն են՝
- 1) կանոնադրական նպատակների իրականացմանն ուղղված ծախսեր,
  - 2) վարչակառավարչական ծախսեր:
- Հիմնադրամի վարչակառավարչական ծախսերը կազմում են հիմնադրամի տարեկան ընդհանուր ծախսերի 20%-ը:
27. Հիմնադրամը պարտավոր է ամեն տարի հրապարակել հաշվետվություն իր գույքի օգտագործման մասին:

#### **V. Հիմնադրամի կառավարման մարմինները**

28. Հիմնադրամն իր գործունեությունն իրականացնում է իր մարմինների միջոցով: Հիմնադրամի մարմիններն են՝
- ա/ հոգաբարձուների խորհուրդը
- բ/ տնօրենը:

#### **V.I. Հոգաբարձուների խորհուրդ**

29. Հիմնադրամի կառավարման բարձրագույն և հսկողություն իրականացնող մարմինը Հիմնադրամի հոգաբարձուների խորհուրդն է (այսուհետ՝ Խորհուրդ):
30. Խորհուրդն ունի 12 անդամ: Խորհրդի անդամները չեն կարող լինել հիմնադրամի այլ մարմնի անդամ:
31. Խորհրդի առաջին կազմը կազմավորում է հիմնադիրը: Խորհրդի անդամների լիազորությունների ժամկետը երկու տարի է: Միևնույն անձը որպես խորհրդի անդամ կարող է առաջադրվել առանց սահմանափակման:
32. Խորհրդի անդամի համար կարող է սահմանվել փոխհատուցում այն ծախսերի համար, որոնք կապված են Խորհրդի անդամի պարտականությունների կատարման հետ: Փոխհատուցման վճարման կարգը սահմանում է Խորհուրդը:
33. Խորհրդի անդամի լիազորությունները դադարում են.
- ա/ դիմումի հիման վրա՝ դիմումի ներկայացման հաջորդ օրվանից,
  - բ/ իր պարտականությունները պատշաճ չկատարելու դեպքում՝ հոգաբարձուների խորհրդի մնացած անդամների ձայների առնվազն 3/4-ով,
  - գ/ մահվան կամ անգործունակ ճանաչվելու դեպքում,
  - դ/ ժամկետը լրանալիս, եթե այն չի երկարաձգվել:
34. Խորհուրդն իր գործունեությունն իրականացնում է նիստերի միջոցով: Նիստն իրավագոր է, եթե դրան մասնակցել է Խորհրդի անդամների կեսից ավելին: Խորհրդի որոշումներն ընդունվում են նիստին մասնակցող անդամների ձայների մեծամասնությամբ: Սույն կանոնադրության 38 կետի ե/, գ/, ը/ ենթակետերով նախատեսված դեպքերում որոշումներն ընդունվում են խորհրդի կազմի 2/3-ի համաձայնությամբ:
35. Նիստերը գումարվում են պարբերաբար՝ բայց ոչ պակաս, քան եռամսյակը մեկ անգամ՝ խորհրդի նախագահի կողմից: Խորհրդի նիստեր կարող են հրավիրվել նաև խորհրդի անդամների 1/3-ի առաջարկությամբ խորհրդի նախագահի կողմից, պահանջը ներկայացնելուց հետո 30 օրվա ընթացքում: Եթե նշված ժամկետում Խորհրդի նախագահը նիստ չի հրավիրում, ապա նիստ կարող են հրավիրել մեկ անգամ պահանջ ներկայացրած անձինք: Խորհրդի նիստերը կարող են անցկացվել էլեկտրոնային փոստի կամ կապի այլ միջոցների կիրառմամբ:
36. Խորհրդի նիստերն օրենսդրությամբ սահմանված կարգով արձանագրվում են:
37. Եթե Խորհրդի նիստում քննարկվում է խորհրդի որևէ անդամի կամ նրա հետ փոխկապակցված անձի գույքային կամ այլ շահերի վերաբերյալ հարց, ապա այդ անդամը քվեարկությանը չի մասնակցում: Եթե գույքային կամ այլ շահերի վերաբերյալ հարցերը կրում են պարբերական կամ անընդհատ բնույթ, ապա տվյալ անդամի լիազորությունների դադարեցման հարց է դրվում Խորհրդի քննարկմանը: «Գույքային և այլ շահեր» հասկացությունը և դրա առաջացման հիմքերը սահմանվում են Խորհրդի որոշմամբ:
38. Խորհրդի իրավասությանն է պատկանում
- ա/ հիմնադրամի ռազմավարական ծրագրի(երի) հաստատումը,
  - բ/ հիմնադրամի բյուջեի, նրա փոփոխությունների, տարեկան ֆինանսական հաշվետվությունների, գործունեության տարեկան հաշվետվությունների հաստատումը.
  - գ/ հիմնադրամի գույքի տնօրինման կարգի հաստատումը,
  - դ/ հիմնադրամի վերակազմակերպման մասին որոշման ընդունումը,
  - ե/ խորհրդի նոր անդամների ընտրությունը և խորհրդի անդամների լիազորությունների վաղաժամկետ դադարեցման մասին որոշումների ընդունումը,
  - զ/ հոգաբարձուների խորհրդի նախագահի, հիմնադրամի տնօրենի ընտրությունը և նրա լիազորությունների դադարեցումը, այդ թվում նաև վաղաժամկետ,
  - է/ հիմնադրամի ղեկավար անձնակազմի հաստատում՝ տնօրենի ներկայացմամբ,
  - ը/ հիմնադրամի կանոնադրության մեջ փոփոխություն կամ լրացում կատարելու, նոր խմբագրությամբ կանոնադրությունը հաստատելու մասին որոշումների ընդունումը,

թ/ տնտեսական ընկերությունների ստեղծման կամ դրանցում մասնակցության, ինչպես նաև առանձնացված ստորաբաժանումների և հիմնարկների ստեղծման և դրանց կանոնադրությունների հաստատման մասին որոշումների ընդունումը,

ժ/ հիմնադրամի ֆինանսատնտեսական գործունեության վերահսկումը,

ժա/ եռամսյա պարբերականությամբ Հիմնադրամի տնօրենի հաշվետվությունների լսումը,

ժբ/ իր որոշումների կատարման ընթացքի վերահսկումը,

ժգ/ Հիմնադրամի աուդիտ իրականացնող անձի ընտրությունը,

ժդ/ իրականացնում է օրենքով և սույն կանոնադրությամբ իրեն վերապահված այլ լիազորություններ:

Խորհուրդն իրավունք ունի ծանոթանալ Հիմնադրամի գործունեության հետ առնչվող բոլոր փաստաթղթերին:

39. Խորհրդի իրավասության հարցերը չեն կարող փոխանցվել այլ մարմնի:

#### **40. Խորհրդի Նախագահը**

- 1) կազմակերպում է Խորհրդի աշխատանքները
- 2) գումարում է Խորհրդի նիստերը և նախագահում է դրանք.
- 3) կազմակերպում է նիստերի արձանագրությունների վարումը:  
Խորհրդի նախագահին ընտրում են Խորհրդի անդամներն իրենց կազմից:

41. Նախագահի բացակայության դեպքում նրա պարտականությունները Խորհրդի որոշմամբ կատարում է անդամներից մեկը:

### **V. II Հիմնադրամի տնօրենը**

42. Հիմնադրամի ընթացիկ գործունեության ղեկավարումն իրականացնում է տնօրենը: Տնօրենը կազմակերպում է Խորհրդի որոշումների կատարումը:

43. Տնօրենի իրավասությանն են պատկանում Հիմնադրամի ընթացիկ գործունեության կառավարման բոլոր հարցերը, բացառությամբ օրենքով և սույն կանոնադրությամբ Խորհրդի իրավասություն հանդիսացող հարցերի:

44. Հիմնադրամի տնօրենն առաջին անգամ պաշտոնում նշանակվում է Հիմնադրի կողմից:

45. Տնօրենը նշանակվում է 4 տարի ժամկետով, որը կարող է երկարաձգվել:

Տնօրենի իրավունքներն ու պարտականությունները սահմանվում են օրենքով, սույն կանոնադրությամբ:

46. Հիմնադրամի տնօրենը՝

- 1) տնօրինում է Հիմնադրամի գույքը, այդ թվում ֆինանսական միջոցները, Հիմնադրամի անունից կնքում է գործարքներ.
- 2) ներկայացնում է Հիմնադրամը Հայաստանի Հանրապետությունում և օտարերկրյա պետություններում,
- 3) գործում է առանց լիազորագրի և տալիս է լիազորագրեր,
- 4) սահմանված կարգով կնքում է պայմանագրեր /այդ թվում՝ աշխատանքային/,
- 5) բանկերում բացում է Հիմնադրամի հաշվարկային /այդ թվում՝ արտարժույթային/ և այլ հաշիվներ,
- 6) Խորհրդի հաստատմանն է ներկայացնում Հիմնադրամի աշխատանքային ներքին կանոնակարգը, առանձնացված ստորաբաժանումների, հիմնարկների ու հիմնադրամի կողմից հիմնադրվող տնտեսական ընկերությունների կանոնադրությունները, հիմնադրամի վարչակազմակերպչական կառուցվածքը և հաստիքացուցակը.
- 7) իր իրավասության սահմաններում արձակում է հրամաններ, հրահանգներ, տալիս կատարման համար պարտադիր ցուցումներ և վերահսկում դրանց կատարումը.
- 8) աշխատանքի է ընդունում և աշխատանքից ազատում Հիմնադրամի աշխատողներին.
- 9) Հիմնադրամի աշխատողների նկատմամբ կիրառում է խրախուսման և կարգապահական պատասխանատվության միջոցներ.

- 10) իրականացնում է օրենքով, սույն կանոնադրությամբ և հիմնադրի հանձնարարականներով նախատեսված այլ լիազորություններ:
47. Տնօրենն այլ կազմակերպությունում կարող է վճարովի պաշտոն զբաղեցնել միայն Խորհրդի համաձայնությամբ:

## **VI. Հաշվապահական հաշվառումը և վերահսկողությունը**

48. Հայաստանի Հանրապետության օրենսդրությամբ սահմանված կարգով հիմնադրամը վարում է հաշվապահական հաշվառում և ներկայացնում է ֆինանսական և վիճակագրական հաշվետվություններ, հարկային և այլ պարտադիր վճարների հաշվարկներ, հայտարարագրեր:
49. Տնօրենը պատասխանատվություն է կրում Հիմնադրամի հաշվապահական հաշվառման կազմակերպման, նրա վիճակի և հավաստիության, տարեկան հաշվետվության, ֆինանսական և վիճակագրական հաշվետվություններն օրենքներով և այլ իրավական ակտերով սահմանված՝ պետական կառավարման մարմիններին ժամանակին ներկայացնելու, ինչպես նաև հիմնադրամի մարմիններին ու այլ անձանց տրամադրվող տեղեկությունների հավաստիության համար՝ օրենքին, այլ իրավական ակտերին, սույն կանոնադրությանը համապատասխան:
50. Հիմնադրամի ֆինանսական հաշվետվությունների աուդիտը կատարվում է անկախ աուդիտորների կողմից՝ առնվազն տարեկան մեկ անգամ: Խորհրդի անդամների 1/3-ի պահանջով կարող է անցկացվել արտահերթ աուդիտորական ստուգում: Աուդիտորները ընտրվում են մրցութային կարգով և հաստատվում են Խորհրդի կողմից:
51. Հիմնադրամի կողմից օրենքի պահանջների կատարման նկատմամբ վերահսկողությունն իրականացվում է Հայաստանի Հանրապետության արդարադատության նախարարության կողմից, իսկ օրենքով սահմանված դեպքերում՝ նաև այլ իրավասու պետական մարմինների կողմից՝ իրենց իրավասության սահմաններում և օրենսդրությամբ սահմանված ընթացակարգերին համապատասխան:
52. Յուրաքանչյուր ֆինանսական տարվա ավարտին հաջորդող 6 ամսվա ընթացքում Հիմնադրամն իրավաբանական անձանց պետական գրանցման մասին տեղեկություններ հրապարակող մամուլում պարտավոր է հրապարակել՝
- 1) հաշվետվություն իր գործունեության մասին
  - 2) իր տարեկան ֆինանսական հաշվետվությունները
  - 3) ֆինանսական հաշվետվությունների վերաբերյալ աուդիտն իրականացնող անձի եզրակացությունը (եթե Հիմնադրամի ակտիվների արժեքը գերազանցում է 10 մլն. դրամը):
53. Հիմնադրամը հաշվետվությունը հրապարակելուց հետո 15 օրվա ընթացքում օրենքով սահմանված կարգով տեղեկացնում է Հայաստանի Հանրապետության արդարադատության նախարարությանը: Սահմանված ժամկետում հաշվետվությունները թերի հրապարակելու դեպքում նախարարության կողմից Հիմնադրամը զգուշացվում է թերությունների վերացման մասին:

## **VII. Հիմնադրամի վերակազմակերպումը և լուծարումը**

54. Հիմնադրամը կարող է վերակազմակերպվել միայն Հիմնադրամի միացման և միաձուլման ձևով, Խորհրդի որոշմամբ՝ օրենքով սահմանված կարգով:
55. Հիմնադրամը լուծարելու մասին որոշումը կարող է ընդունել միայն դատարանը՝ շահագրգիռ անձանց դիմումով: Հիմնադրամը լուծարվում է օրենքով սահմանված դեպքերում և կարգով:
56. Լուծարման դեպքում պարտատերերի պահանջները բավարարելուց հետո, ինչպես նաև պարտատերերի նկատմամբ պարտավորություններ չունենալու դեպքում՝ Հիմնադրամի գույքն ուղղվում է Հիմնադրամի կանոնադրությամբ նախատեսված նպատակներին, իսկ դրա անհնարինության դեպքում՝ Հայաստանի Հանրապետության պետական բյուջե: